

TIRANË 2019



MONITORIMI I
PAKTIT PËR UNIVERSITETIN
— JANAR-NËNTOR 2019 —



1. Hyrje

2. Metodologjia e monitorimit

3. Gjetjet kryesore

4. Monitorimi i “Paktit për Universitetin” Janar – Nëntor 2019

- 4.1 Buxheti, tarifat dhe investimet në konvikte
- 4.2 Transparenca me buxhetin dhe publikimi i shpenzimeve të IAL-ve online
- 4.3 Rritja e peshës së votës së studentëve nga 10% në 50% në zgjedhjen e strukturave akademike
- 4.4 Përfaqësimi i studentëve në Bordin e Administrimit të IAL-ve
- 4.5 Pajisja me Kartë Studenti e të gjithë studentëve brenda vitit akademik 2018 – 2019
- 4.6 Rishikimi i titujve akademikë, teskteve mësimore dhe verifikimi i plagjiaturave në doktoratura
- 4.7 Vlerësim i performancës në mësimdhënie, në publikimet online dhe regjistrimi i leksioneve.
- 4.8 Ndërtimi i bibliotekave me standarte Europiane dhe me libër universitar online falas për studentët në gjuhën shqipe.
- 4.9 Premtimet Plus

5. Konkluzione

6. Shtojca

Ky monitorim u ndihmua cilësisht nga grupi i studentëve “Arsimi në Fokus”, nga konsultimet e vazhdueshme me stafet akademike të universiteteve publike dhe bashkëpunimit me Komisionerin për të Drejtën e Informimit dhe Mbrojtjen e të Dhënave Personale.

Gjetjet, rekomandimet dhe opinionet e shprehura në këtë monitorim, nuk përfaqesojnë domosdoshmërisht ato të donatorit.

1.Hyrje

Protesta e dhjetorit 2018 ishte shfaqja më masive e revoltës studentore në historinë e tranzicionit. Kjo protestë arriti që në mungesë të drejtimit apo orientimit nga ndonjë subjekt politik apo shoqëror, t'i paraqesë qartë dhe t'i imponohet qeverisë me 8 kërkesa që lidheshin me reduktimin e tarifave, transparencën e shpenzimeve, përfaqësimin studentor, performancën në mësimdhënie dhe vetingun e titujve akademikë.

Si rezultat i masivitetit, qëndrueshmërisë dhe kërkesave të drejta, studentët iu imponuan qeverisë dhe kryeministrit duke i detyruar të publikojnë **“Paktin për Universitetin”**¹, të shkarkojë nga detyra Ministren e Arsimit, Sportit dhe Rinisë znj.Lindita Nikolla, si dhe të zvendësojë të gjithë përfaqësuesit e Ministrisë në Bordet e Administrimit në universitetet publike në vend. “Paktin për Universitetin”, kjo paketë premtimesh dhe masash u shpall nga kryeministri në 19 Dhjetor 2018 në Universitetin “Ismail Qemali” në Vlorë dhe më pas u konkretizua në **11 VKM dhe 4 Urdhëra të Kryeministrit në 26 dhjetor 2018**, akte të cilat synuan të adresonin një pjesë të 8 kërkesave të formuluar dhe kërkuara nga studentët gjatë protestës.

Qëndresa Qytetare nëpërmjet nismës **“Arsimi në Fokus” me mbështetjen e Qendrës Olof Palme**, monitoroi implementimin e **“Paktit për Universitetin”** duke përfshirë çdo akt, afat, vendim apo iniciativë të adresuar në këtë dokument politikash.

Qëllimi i këtij monitorimi është nxitja e llogaridhënies dhe transparencës së zbatimit të masave të ndërmarra nga qeveria në kuadër të paktit dhe maksimizimi i përfitimeve të studentëve nëpërmjet fuqizimit dhe përfshirjes së tyre në këtë proces. Monitorimi synon gjithashtu të ushtrojë presionin e nevojshëm ndaj qeverisë për të implementuar në kohë dhe me cilësi premtimet e bëra në Paktin për Universitetin.

Njëkohësisht kjo nismë synon të ndërgjegjësojë palët e interesuara (studentë, pedagogë, OJF dhe aktivistë të shoqërisë civile), të veprojnë për të përfituar maksimumin nga “Pakti për Universitetin”, për studentët me qëllim final përmirësimin e cilësisë arsimore dhe jetës studentore.

❖ Rëndësia e Monitorimit të “Paktit mbi Universitetin”:

Së pari nëpërmjet këtij monitorimi Qëndresa do të vlerësojë ndryshimet, përmirësimet dhe risitë që do të sjellë pakti qeveritar për universitetin në arsimin e lartë në Shqipëri përgjatë vitit 2019, në raport me cilësinë dhe plotësimin e kërkesave reale të studentëve.

Pakti për Universitetin është produkt i forcës së një proteste të pastër qytetare të orientuar tek kërkesat e një grupi shoqëror siç janë studentët dhe monitorimi i ecurisë së tij shërben si analizë që qytetarët shqiptarë të kuptojnë se protesta të tilla shërbejnë si precedentë pozitive nëse premtimet e qeverisë realizohen ose si precedentë negativë nëse faktohet që masat e qeverisë në kuadër të këtij pakti të mos zbatohen dhe të rezultojnë si mekanizma për të shuar protestën (pretendime të grupimeve të ndryshme gjatë protestës).

¹<https://www.kryeministria.al/wp-content/uploads/2019/01/PAKTI-P%C3%8BR-UNIVERSITETIN.pdf>

❖ Kohështrirja


Ekipi i Qëndresës dhe i ekspertëve që mori pjesë në monitorimin e “Paktit për Universitetin”, u anagazhua nëpërmjet publikimit të raporteve periodike 3-mujore të ecurisë së zbatimit të politikave qeveritare dhe në një dokument final përmbyllës në fund të muajit tetor, moment kur edhe pjesa dërrmuese e afateve të realizimit të premtimeve të Paktit për Universitetin ka mbaruar.

❖ Kërkesat e Studentëve

Protesta e studentëve nisi me kërkesën për shfuqizimin e tarifës së riprovimit në datën 5 Dhjetor 2018, tarifë të cilën qeveria e shfuqizoi vetëm një ditë pas protestës. Ditën e tretë studentët dolën me 8 kërkesa zyrtare drejtuar Kryeministrit dhe MASR, dhe pasi protesta arriti pjesëmarrjen më masive, qeveria pranoi kërkesat dhe në mungesë të dialogut ofroi në 19 dhjetor “Paktin për Universitetin” si përgjigje ndaj tyre.

8 kërkesat e studentëve në Protestën e Dhjetorit:

1. Rritje e buxhetit të arsimit në masën 5% e GDP me qëllim mundësimin e përgjysmimit të tarifës së studimit për çdo nivel studimi, përmirësimin e mësimdhënies dhe infrastrukturës.
2. Transparencë me buxhetin nga MASR dhe IAL-të, publikim i të gjitha shpenzimeve online.
3. Rritje e peshës së votës së studentëve nga 10% në 50% në zgjedhjet për strukturat akademike.
4. Bordi i Administrimit të ketë numër të barabartë anëtarësh nga IAL dhe MASR dhe një përfaqësues në këtë bord të jetë nga studentët.
5. Pajisja e të gjithë studentëve me Kartën e Studentit brenda vitit akademik 2018 – 2019.
6. Rishikimi i titujve akademikë dhe verifikimi i plagjiaturave të doktoraturave dhe teksteve mësimore.
7. Vlerësim i performancës në mësimdhënie dhe kërkim shkencor, publikimet online dhe regjistrimi i leksioneve.
8. Ndërtimi i bibliotekave me standarte Europiane dhe me libër universitar online falas për studentët në gjuhën shqipe.



2. Metodologjia e monitorimit

Për të realizuar këtë monitorim është ndjekur metodologjia e grumbullimit të informacionit nga disa burime duke u nisur nga:

- a) Shfletimi i Fletores Zyrtare
- b) Verifikim i publikimeve të akteve të qeverisë
- c) Kronikat mediatike në televizione
- d) Publikimet zyrtare në faqet e internetit dhe rrjetet sociale të Kryeministrit dhe qeverisë.
- e) Institucioneve të përfshira dhe përgjegjëse për implementimin e Paktit për Universitetin u janë dërguar *kërkesa për informacion* për të grumbulluar informacion dhe vlerësuar procesin sipas të dhënave të nxjerra nga vetë institucionet.
- f) Janë zhvilluar takime periodike me studentë të 5 universiteteve të cilët kanë plotësuar fishën e raportimit mbi premtimet dhe afatet e “Paktit për Universitetin” të zbatuara në universitete, për të grumbulluar edhe informacion nga studentet si përfitues drejtpërdrejtë.

Për të realizuar këtë monitorim janë angazhuar ekspertë të fushës së arsimit dhe Rrjeti i Studentëve “Arsimi në Fokus”, grupim i cili u trajnuar dhe fuqizua gjatë implementimit të kësaj nisme.

Është synuar të paraqitet informacion i sintetizuar dhe lehtësisht i kuptueshëm se si qëndron:

- Raporti i kërkesave të studenteve dhe reflektimi i tyre në Paktin për Universitetin.
- Niveli i efektivitetit të realizimit të premtimeve që parashikon “Pakti për Universitetin”.
- Raporti i transparencës së institucioneve dhe qeverisë mbi punën e realizuar duke vlerësuar komponentin e:
 - Publikimeve zyrtare
 - Komunikimeve publike
 - Përgjigjes së kërkesave për informacion

Ekipi i Qëndresës **ka vlerësuar gjithashtu cilësinë, transparencën, territorin dhe kohën** e realizimit të premtimeve që parashikon Pakti për Universitetin ku indikator kryesor matës ka qënë efektiviteti i realizimit të premtimit:

“Efektiviteti (effectiveness) është tregues me të cilin shprehet vlerësimi i ndikimit të një veprimi në një proces të caktuar apo thënë ndryshe niveli i realizimit të objektivave dhe marrëdhëniet ndërmjet rezultatit të pritur dhe rezultatit faktik të veprimtarisë.”

3.Gjetjet Kryesore

- ❖ Paktit për Universitetin **nuk reflektoi tërësisht 8 kërkesat e studentëve**, qeveria **nuk respektoi afatet** e shumicës së premtimeve të vendosura vetë dhe **përfshirja e studentëve në këtë proces rezultoi e ulët**.
- ❖ Procesi i zgjedhjes nga studentët i anëtarëve përfaqësues të MASR në Bordet e Administrimit **tejkaloj afatet e parashikaura**, u shoqëruan me **mungesë transparence dhe pjesëmarrje të ulët në votime (11% në UT, 1.33 % në UMT)**. MASR skualifikoi kandidatët pasi ata u votëbesuan nga studentët dhe në disa raste përzgjedhi kandidatët jo në bazë të votave të studentëve por në bazë të Kodit të Procedurave Administrative.
- ❖ Nga 35 anëtarët e emëruar nga MASR, **18 janë funksionarë të administratës publike**, 8 nga bota akademike, 6 nga shoqëria civile dhe sektori privat dhe 3 nga fusha e gazetarisë. **Vetëm 13 prej tyre janë figura publike** ndërsa 22 anëtarë janë persona me profil të ulët sa i përket prezencës dhe informacionit që gjendet për ta në publik.
- ❖ **Nuk u mbajt premtimi për nisjen e procesit të rishikimit të titujve shkencorë dhe kontrollit anti-plagjiaturë në muajin Qershor 2019 sipas VKM nr. 777**. Pas mbarimit të afatit të Paktit për Universitetin rezultojnë 0 tituj të rishikuar, pavarësisht se sipas SKS 34% e studentëve shprehen se pedagogët e tyre janë jo kompetente për shpjegimin e njohurive.
- ❖ **Biblioteka dixhitale kushtoi 687.825 USD por studentët nuk arrijnë të gjejnë informacion që përkon me kurrikulat** e tyre mësimore dhe **nuk aksesojnë asnjë libër apo material shkencor në gjuhën shqipe** siç edhe u premtua në Paktin për Universitetin.
- ❖ Megjithëse MASR është institucioni përgjegjës, buxheti i këtij institucioni në dispozicion të Kartës së Studentit për vitin 2019 **është 0 lek, ndërkohë** mbi 20.000 studentë në Tiranë janë pajisur me Kartën e Studentit deri në fillim të muajit nëntor si edhe ka nisur procesi i shpërndarjes në rrethe.
- ❖ Sondzhi Kombëtar i Studentëve jo vetëm që nuk përfundoi në afatet e parashikuara, por në raport me publikun dhe studentët **rezultatet e tij nuk janë bërë ende publike dhe nuk arriti të krijojë dosje vlerësimi për pedagogët e IAL-ve publike**.
- ❖ Portali U-transparenca.al përmban të dhëna zyrtare mbi CV-të e pedagogëve dhe emrat e Anëtarëve të Bordeve por nuk përmban **Vendimet e zbardhura të Bordeve, Prokurimet dhe kontratat publike dhe qartësi të treguesve financiarë për studentët**.
- ❖ Brenda muajit Maj 2019 duhej të krijohej Fondi i Solidaritetit për arsimin e lartë, ku 20 % e fondit të përgjegjësisë sociale të korporatave që gëzojnë kontrata koncesionare të shkojnë për financimin e Arsimit të Lartë, por **nuk ka asnjë shifër ose dokument publik që provon krijimin e Fondit të Solidaritetit dhe investimin e tij në arsimin e lartë**.

4. Monitorimi i “Paktit për Universitetin” Janar – Nëntor 2019

4.1 Buxheti, tarifat dhe investimet në konvikte

Buxheti për arsimin nuk u rrit në masën 5% të GDP, por mbeti i pandryshuar sipas miratimit të tij në Dhjetor 2018, me përjashtim të ndryshimit të vlerës 300.000 milion lekë të reja për rikonstruksionin e konvikteve të shtuar nëpërmjet aktit normativ Nr. 2, datë 19.12.2018 dhe Aktit Normativ të nxjerrë në muajin tetor 2019 ku vihet re një shkurtrim i fondeve të arsimit të lartë nga 7.4 në 7.2 miliardë lekë apo 1.6 milionë euro.

Fondet për “Sektorin e Arsimit” të parashikuara për vitin 2019, si pjesë e buxhetit për arsimin, në total arrijnë në vlerën e 57.8 miliardë lekë. Krahasuar me Produktin e Brendshëm Bruto, fondet për sektorin e arsimit parashikohet të arrijnë në 3.3% e PBB-së, por të ardhurat që alokohen për arsimin e lartë referuar edhe vitit 2018 shkojnë vetëm në 0.4 % të PBB-së.

Tarifat dhe Bursat. Nëpërmjet tri Vendimeve të Këshillit të Ministrave nr. 779, 780 dhe 784 datë 26.12.2018 qeveria realizoi një pjesë të kërkesës së parë të studentëve duke hequr tarifën e studimit për studentët me mesatare mbi 9, duke ofruar bursa për ta dhe duke përgjysmuar tarifën për studentët e tjerë të bachelor, vetëm për vitin 2018 – 2019. Po ashtu nëpërmejt këtyre VKM-ve qeveria reduktoi në masën 50% edhe tarifën e studentëve të ciklit master me mesatare mbi 9. Përgjysmimi i tarifave u arrit vetëm për kategori preferenciale sipas një skeme të ofruar nga qeveria, asaj të përshkallëzimit të tarifave bazuar në meritë, jo për të gjithë siç u kërkua nga studentët. Efekti financiar nga buxheti i shtetit në total për reduktimin e tarifave dhe bursave në nivelin bachelor për vitin akademik 2018 – 2019 ishte 2.1 Miliardë lek ose i ndarë sipas kateogrive në tabelën më poshtë:

Niveli i studimit	Masa e përfitimit	Kategoria e studentit përfitues	Numri i përfituesve	Efekti financiar në buxhetin e shtetit
Bachelor	Përjashtim 100% nga tarifa	Studentët me notë mesatare 9 deri 10	6,235 studentë	201.9 milionë lekë
Bachelor	Përjashtim 50% nga tarifa	Studentët me notë mesatare nga 5 deri 9	70.000 studentë	1 miliardë lekë
Bachelor	Bursë 10.000 lekë/muaj	Studentët me mesatare nga 9 deri në 10 dhe studentëve të familjeve përfitues të Ndhmës Ekonomike	8703 studentë	460 milionë lekë
Master	Reduktimi me 50% i tarifës së studimit	Studentët me notë mesatare 9 deri në 10	3311 studentë	150 milionë lekë
Master/bachelor	Përgjysmim i tarifës së konvikteve të parestauruara	Të gjithë studentët eregjistruar në konvikte	8000 studentë	200 milion lekë
Totali			96.249	2.1 Miliard lekë

**Efekti financiar në buxhetin e shtetit për përfituesit e kategorisë “studentë më notë mesatare nga 5 deri në 9 të nivelit të studimeve bachelor ishte vetëm për vitin 2019, pasi për vitin 2020 do të reduktohet për studentët me mesatare mbi 6.*

Konviktet. Gjendja e infrastrukturës në konvikte para protestes paraqitej tejte e amortizuar pothuajse në Tiranë dhe në të gjitha ndërtesat në rrethe. Ndërtesat kishin nevojë urgjente për rehabilitim, pajisje me mobilie, shtretër, bazë materiale, dyshekë e çarçafë të rinj etj. Sipas raportit të Qëndresës Qytetare në muajin Shkurt 2018, 89 % e studentëve pohonin se tualetet e tyre ishin jashtë standarteve normale, ku kryesisht mungonin dyert, uji i rrjedhshëm dhe pajisjet e higjienës.²

Administrimi: Aktualisht, funksionojnë 8 shoqëri për akomodimin e studentëve, 3 prej të cilave janë në Tiranë dhe 5 të tjera në Vlorë, Shkodër, Elbasan, Gjirokastrë dhe Korçë.

Financimi dhe ndërrhyrja: Fondi që MASR ka në dispozicion, për të mbuluar shpenzimet operative për këto shoqëri, është 350 milionë lekë në vit, ndërsa pjesa tjetër mbulohet nga të ardhurat e vetë ndërmarrjeve të cilat sigurohen nga tarifat e akomodimit të studentëve.

#PAKTIPËR UNIVERSITETET

RIKONSTRUKTIMI I KONVIKTEVE

10,200 STUDENTË
SHKODËR, TIRANË, ELBASAN,
KORÇË, VLORË DHE GJIROKASTËR

600 MILION LEKË INVESTIME



MINISTRIA E ARSIMIT,
SPORTIT DHE RINISË

Qeveria shqiptare nën presionin e protestës së studentëve u detyrua të zbatojë me emergjencë një marrëveshje granti të nënshkruar në vitin 2016 me Bankën Gjermane për Zhvillim (KFË) për rikonstruksionin e konvikteve të studentëve në Tiranë sipas parimit të efikasitetit të energjisë në vlerën 18.8 milion euro.

Gjithashtu, përsëri në kuadër të Paktit për Universitetin qeveria u detyrua të ndryshojë buxhetin e shtetit për vitin 2019 nëpërmjet aktit normativ Nr. 2, datë 19.12.2018 duke alokuar edhe 300 milionë lekë të reja plus për rikonstruksionin e konvikteve.

Ministrja e Arsimit, znj. Besa Shahini në datën 7 tetor 2019 publikoi të dhënat se nga buxheti i shtetit janë akorduar 600.000 milion lekë për rikonstruksionin e konvikteve në rrethe.

Transparenca: I gjithë procesi i investimeve në konvikte është shoqëruar nga mungesa e transparencës financiare dhe pse titullaret kryesorë të pushtetit qëndror dhe vendor kanë dalje të përmuajshme në këto godina.

²<http://qendresaqytetare.al/ep-content/uploads/2018/02/Analiza-e-pyetesorit-mbi-kushtet-Higjieno-Sanitare-ne-Qytetin-Studenti.pdf>

Në këtë kontekst vlen të thekshet se bashkia e dytë universitare më e madhe në Shqipëri, ajo e Durrësit nuk ka asnjë konvikt për studentët që studiojnë në Universitetin “Aleksandër Moisiu”.

Premtime:

1 Gjatë fushatës elektorale për zgjedhjet vendore, Kryetari i Bashkisë Tiranë premtoi se brenda mandatit të tij të dytë do të ndërtojë Kampusin Universitar, i cili do të përbëhet nga 11 godina të reja në Qytetin Studenti, si dhe ambiente të reja leximi e studimi.³

2. Në kuadër të investimeve në infrastrukturë nga qeveria në kuadër të Paktit për Universitetin në një takim në UBT, kryeministri bëri publik një investim 1 milion euro për një fermë didaktike me një sipërfaqe prej 135 hektarë në kuadër të marrëveshjes mes Ministrisë së Bujqësisë dhe Universitetit Bujqësor të Tiranës më 15 Mars 2019.

Gjendja aktuale: Sipas të dhënave të paraprahe në kryeqytet aktualisht janë ndërtuar godinat A dhe B pranë Inxhinierisë së Ndërtimit sipas parimit të efijencës së energjisë nga fondi i KFË dhe ka përfunduar ndërhyrja e bashkisë në 13 nga 25 godina në Qytetin Studenti.

4.2 Transparenca me buxhetin dhe publikimi i shpenzimeve të IAL-ve online

*Nisur nga kërkesa e studentëve por edhe nga gjetjet e monitorimit të Qëndresës gjatë vitit akademik 2017 – 2018 ku paratë e studentëve shkuan për shpenzime luksi për rektorët, makina dhe kontrata të fryra të ruajtjes së godinave dhe jo për shkencë dhe shërbime ndaj studentëve, qeveria e adresoi këtë kërkesë në “**Paktin për Universitetin**” duke premtuar krijimin e një strukture në MASR, përgjegjëse për kontrollin e transparencës në arsimin e lartë dhe portalit **U-transparenca** me të dhëna të detajuara mbi shpenzimet e universiteteve dhe mundësi ankimi nga studentët.*

Referuar VKM 781/2018 në fillim të muajit Prill 2019 u krijua portali **u-transparenca.al** i cili përmban të dhëna për CV-të e pedagogëve të pjesës dërmuese të universiteteve publike, të dhëna mbi emrat dhe CV-të e Anëtarëve të Bordit të Administrimit të emëruar nga MASR dhe informacion mbi të ardhurat dhe shpenzimet e universiteteve në raporte 3 – mujore.

Aktualisht portali shfaq problematika dhe mungesa në:

- Publikimin e vendimeve të zbardhura të Bordeve të Administrimit të IAL-ve.
- Dokumentacionin e prokurimeve publike të universiteteve (Tendera, kontrata, kërkesa, oferta dhe detaje të tjera).

>   <https://u-transparenca.al>



BUXHETI | BURSAT | ANKESA IME | PROKURIMET | MARREVESHJET
STAFI AKADEMIK | SHKEMBIMET STUDENTORE | VENDIMET | BORDI DREJTUES

Portali i Transparencës Universitare

4.3 Rritja e peshës së votës së studentëve nga 10% në 50% në zgjedhjen e strukturave akademike

Në dokumentin e Paktit për Universitetin qeveria ka argumentuar refuzimin e kësaj kërkesë duke parashtruar shembujt e vendeve të tjera të Evropës dhe Rajonit të cilat nuk e kanë peshën e studentëve në zgjedhjet për strukturat akademike më të lartë se 20%. Por në këtë aspekt nuk është marrë parasysh tradita ligjore e ligjit për arsimin e lartë të vitit 2007, ku pesha e votës së studentëve ka qënë në masën 20%, ndryshim i cili mund të inkorporohej edhe në ligjin aktual 80/2015.

Në 30 Janar 2019 deputetë të Lëvizjes Socialiste për Integrim prezantuan një iniciativë ligjore në Komisionin Parlamentar të Edukimit dhe Mjeteve të Informimit Publik për të ndryshuar peshën e votës së studentëve nga 10% në 50%, nismë e cila i përgjigjej kërkesës së studentëve. Kjo iniciativë nuk u mirëprit nga mazhoranca dhe Pakti për Universitetin nuk parashikoi asnjë ndryshim ligjor.

Në muajin shtator 2019 Qëndresa Qytetare, e përkrahur nga një grup studentësh nga universitetet publike, i paraqiti Ministres së Arsimit një kërkesë dhe draft për rritjen e peshës së votës në masën 30%, duke iu referuar precedentit të ligjit për arsimin e lartë të vitit 2007, ku pasha e votës së studentëve dhe stafit joakademik ishte 25% dhe precedentit të Universitetit të Barcelonës ku pasha e votës së studentëve ishte 30%. Edhe kjo kërkesë u refuzua prerazi nga Ministrja dhe stafi i saj.

Pjesë e premtimeve të kësaj pike në **“Paktin për Universitetin”** në kuadër të rritjes së përfaqësimit të studentëve në strukturat universitare ishte edhe premtimi për të realizuar zgjedhjet e **Këshillave Studentore brenda muajit qershor**, por keto zgjedhje u realizuan brenda afatit vetëm në Universitetin “Ismail Qemali” të Vlorës pra **vetëm në një nga 14 universitete publike**.

4.4 Përfaqësimi i studentëve në Bordin e Administrimit të IAL-ve

Sipas Ligjit për Arsimin e lartë, Bordet e Administrimit përbëhen nga shtatë anëtarë, të punësuar me kohë të pjesshme. Anëtarët, përfaqësues të IAL-së, përzgjidhen nga Senati Akademik i IAL-së. Anëtarët përfaqësues të Ministrisë përgjegjëse për Arsimin dhe njësisë së qeverisjes vendore janë ekspertë të njohur nga fushat akademike, menaxheriale, ekonomike dhe juridike dhe emërohen përkatësisht nga ministri përgjegjës për Arsimin dhe kryetari i njësisë së qeverisjes vendore.

Përbërja e Bordit të Administrimit përcaktohet në varësi të Planit Buxhetor Afatmesëm të Institucionit publik të Arsimit të Lartë. Nëse institucioni siguron vetë pesëdhjetë për qind (50%), ose më shumë të buxhetit afatmesëm, katër prej anëtarëve janë përfaqësues të IAL-së dhe tre janë përfaqësues të Ministrisë përgjegjëse për Arsimin. Në rastet kur institucioni siguron vetë më pak se pesëdhjetë për qind të buxhetit afatmesëm, tre prej anëtarëve janë përfaqësues të IAL-së dhe katër janë përfaqësues të Ministrisë përgjegjëse për Arsimin. Sot, nga gjithë IAL-të publike, vetëm Universiteti i Tiranës ka një shumicë nga përfaqësues të Universitetit.

Më 26.12.2018 u miratua Vendimi nr. 782 i Këshillit të Ministrave **“Për përcaktimin e kriterëve dhe të procedurave të përzgjedhjes së anëtarëve të Bordit të Administrimit, përfaqësues të Ministrisë përgjegjëse për Arsimin, në Institucionet publike të Arsimit të Lartë”**. Si rezultat i kësaj VKM-je:

- **Zvendësohen** të gjithë Anëtarët e Bordeve të emëruar nga MASR.
- **Emërimet** e reja do të bëhen më një *proces të hapur dhe me vëmendje publike*.
- **Njëri prej anëtarëve** që emërohet prej MASR, të vijë propozim nga studentët, por të jetë figurë publike në përputhje me ligjin.

Referuar këtij akti nënligjor në 9 Shkurt 2019 MASR shpalli konkursin për Anëtarët e Bordit, përfaqësues të Ministrisë dhe studentëve por për shkaqe ende të pa bëra publike ky proces u shty tri herë për ri-aplikim dhe zgjati rreth 1 muaj e gjysëm dhe **pavarësisht se afati i Paktit për Universitetin ka përfunduar vendet e përfaqësuesit të studentëve janë ende vakante**. Ajo që bie në sy nga publikimi i listës së anëtarëve të Bordeve të Administrimit të emëruar nga MASR është se vetëm në 8 nga 12 Universitete u emëruan përfaqësuesit e studentëve, ndërsa anëtarët e emëruar nga MASR nuk rezultojnë të jenë figura publike siç është parashikuar në VKM.

Gjatë periudhës së monitorimit u zhvilluan disa procese të rëndësishme në lidhje me rikompozimin e Bordeve të reja të Administrimit duke emëruar dhe zgjedhur anëtarët nga MASR dhe anëtarët e zgjedhur nga vetë studentët në pjesën dërmuese të universiteteve publike.

4.4.1 Procesi i emërimit të Anëtarëve të Bordeve të Administrimit nga MASR

Pas zëvendësimit të 35 anëtarëve të Bordeve të Administrimit, përfaqësues të MASR vihet re se një pjesë e madhe e tyre vijnë si zyrtarë të administratës publike përkatësisht 18 prej tyre, 8 vijnë nga fusha akademike, 6 vijnë nga shoqëria civile dhe sektori privat dhe 3 vijnë nga fusha e gazetarisë.

Pavarësisht se Anëtarët e Bordit sipas qeverisë u riformatuan për të vendosur në to figura publike dhe për t'i dhënë mundësi studentëve të votonin një përfaqësues të zgjedhur prej tyre. Nuk ka munguar presioni dhe denoncimi nga studentët, akademikët⁴ dhe shoqëria civile⁵ mbi keq-menaxhimin dhe konfliktin e interesit të Anëtarëve të rinj të Bordit, të cilët kryesisht ishin zyrtarë të lartë të administratës publike. Pra sërisht MASR ka qëndruar tek formati i zyrtarëve të shtetit për tu përfaqësuar në borde.

Megjithëse një nga kriteret që duhet të përmbushnin të zgjedhurit në borde ishte të qënurit figurë publike, sipas monitorimit të Qëndresës Qytetare **vetëm 13 nga 35 anëtarët e rinj të emëruar nga MASR janë figura publike**. Pra 22 të emëruar në borde janë persona me profil të ulët sa i përket prezencës dhe informacionit që gjendet për ta në publik (përfundim i nxjerrë edhe nga konsultimet me studentët dhe monitorimi i publikimeve apo prezencës në media i këtyre individëve).

⁴ <https://urbanlajme.com/2018/12/09/artan-fuga-ndez-protesten-e-studenteve-ja-cfare-paralajmeron-per-ne-mbremje/>

⁵ <https://www.facebook.com/qendreseqytetare/photos/a.1730930620466161/2701041240121756/?type=3&theater>

4.4.2 Procesi i përzgjedhjes së Anëtarëve të Bordeve të Administrimit nga studentët

Procesi për të zgjedhur Anëtarët e Bordeve të Adminsitrimt nga studentët si përfaqësues të MASR ka përfunduar vetëm në 8 nga 12 universitete. Në Universitetin Politeknik të Tiranës procesi u anuluar me urdhër të MASR për shkak se kandidatura e përzgjedhur nga studentët ishte në konflikt interesi pasi i përkiste stafit akademik të UPT, në Universitetin e Tiranës fitues nga votat e studentëve u shpall pedagogu Llesh Lleshaj por kjo kandidaturë u shpall e pavlefshme me argumentin se angazhimi në përbërjen e Bordit të Administrimit të UPT-së apo UT, si përfaqësues të ministrisë përgjegjëse për arsimin, të përfaqësuesve të përcjell, cënon parimin e balancës së përbërjes së këtij organi, pasi kandidaturat fituese janë pjesë e personelit akademik të UPT apo UT.

Antaret e bordit te administrimit zgjedhur nga studentet

Nr.	IAL	Antaret e bordit te administrimit zgjedhur nga studentet
1	Universiteti "Luigj Gurakuqi" Shkodër	Ted Paco
2	Universiteti Bujqësor i Tiranës	Marin Mema
3	Universiteti "Eqerem Çabej" Gjirokastër	Erjon Nebiaj
4	Universiteti "Ismail Qemali" Vlorë	Anjeza Shiko
5	Universiteti "Aleksandër Moisiu" Durrës	Etleva Leskaj
6	Universiteti "Aleksandër Xhuvani" Elbasan	Luan Rapi
7	Universiteti "Fan Noli" Korçë	Artur Balli
8	Universiteti i Arteve	Bujar Kapexhiu

Për kandidatët e Universitetit të Mjekësisë Tiranë (UMT), Ministria e Arsimit, Rinisë dhe Sportit ka kërkuar ripërsëritjen e zgjedhjeve. Argumentimi: “Duke synuar që rezultati i këtij procesi zgjedhor të jetë reflektim i drejtë i vullnetit të

komunitetit të studentëve, interes e të cilëve do të përfaqësohen në Bordin e Administrimit të UMT-ës, si dhe me besimin që në themelet e legjitimitetit të një procesi zgjedhor demokratik qëndron pjesëmarrja në zgjedhjen, vërejmë me keqardhje se niveli i ulët i pjesëmarrjes prej **1.33% e studentëve**, nuk garanton implementimin e frymës së Paktit për Universitetin” si dhe nuk garanton aspak përfaqësimin e zërit studentor në këtë organ.

<i>Përbërja e Bordeve të reja</i>	Administrata publike	Pedagogë	Gazetarë	Sh.civile/ S.Privat	Në proces	Total	Figura publike
<i>Anëtar Bordin i emëruar nga MASR</i>	18	8	3	6	0	35	13
<i>Anëtar Bordin i votuar nga Studentët</i>	3	1	2	2	4	12	2

Si rezultat i këtyre ndryshimeve mund të themi se:

*Kryeministri zëvendësoi anëtarët e Bordeve të Administrimit por sërish u emëruan zyrtarë të qeverisë, persona larg botës akademike, ish politikanë ose përfaqësues të posteve politike. Si rrjedhim me zvendësimin e bordeve nuk pati ndryshim elitash dhe frymë por vetëm ndryshim emrash. Gjithashtu **administratorët që janë personat e lidhur drejtpërdrejt me menaxhimin e parave të studentëve vazhdojnë të jenë në detyrë.**

*Studentët kërkuan që një prej anëtarëve të Bordit të Administrimit të jetë student, ndërsa **MASR ofroi që një prej tyre të votohet nga studentët.**

*Procesi i zgjedhjes nga studentët i anëtarëve përfaqësues të MASR **tejkaloj afatet e parashikaura** sipas Paktit për Universitetin. Megjithëse procesi duhet të mbaronte në muajin mars 2019, edhe deri në 30 Qershor 2019 nuk përfundoi tërësisht.


*Votimet e studentëve për anëtarët e Bordeve të Administrimit u shoqëruan me **mungesë transparence dhe pjesëmarrje**. Në universitetin më të madh në Shqipëri atë të Tiranës morën pjesë vetëm 11% e studentëve në votime për Bordet e Administrimit, ndërsa në atë të Mjeksësisë Tiranë vetëm 1.33%.

***Mungesa e rregullores specifike** mbi procesin e votimeve për anëtarë bordi solli cënim të së drejtës së votës, pasi MASR i përzgjedhi kandidatët jo në bazë të votave por në bazë të kodit të procedurave administrative ku titullari, në këtë rast Ministri i Arsimit ka të drejtë të zgjedhë një nga 3 kandidaturat pavarësisht numrit të votave që ka grumbulluar ajo kandidaturë.

* **Penalizimi i kandidatëve** që vinin nga rradhët e pedagogëve, pas pjesëmarrjes në procesin zgjedhor dhe shprehjes së vullnetit të studentëve për të qënë ata përfaqësues të studentëve.

Për ta ilustruar edhe vënë në dukje këtë problematikë do t'i referohemi votimeve të realizuara në Universitetin “Fan Noli” në Korçë, ku Minsitrja e Arsimit znj. Besa Shahini urdhëroi emërimin e kandidatit “Artur Balli” duke cënuar demokracinë dhe vullnetin e votive të studentëve, shumica e të cilëve votoi për kandidaten “Kostanca Doku”.

Rezultati i zgjedhjeve për anëtar të Bordit të Administrimit në Universitetin e Korçës.


 REPUBLIKA E SHQIPËRISË
 REPUBLIKA E SHQIPËRISË
 UNIVERSITETI "FAN S. NOLI" KORÇË
 KOMISIONI INSTITUCIONAL I ZGJEDHJEVE

Nr. 933 Prot. Korçë më 16.05.2019

VENDIM Nr. 249

Në zbatim të rregullores nr. 2459/1, datë 15.03.2016 "Për organizimin e zgjedhjeve të para për autoritetet dhe organet drejtuese në institucionet publike të arsimit të lartë në Republikën e Shqipërisë", si dhe VKM Nr. 782, datë 26.12.2018, "Për përcaktimin e kritereve dhe të procedurave të përzgjedhjes së anëtarëve të bordit të administrimit, përfaqësues të ministrisë përgjegjëse për arsimin, në institucionet publike të arsimit të lartë", Komisioni Institucional Zgjedhor pasi mori vendimet për rezultatet e KZF-ve dhe bëri mbledhjen e votave

VENDOSI:

1- Të shpallë rezultatit përfundimtar të zgjedhjeve për anëtar të bordit të administrimit që votohet nga studentët:


ALBENS TABAKU	153 VOTA
ARTUR BALLI	259 VOTA
KOSTANCA DOKU	313 VOTA
LORENC BELLOVODA	219 VOTA
MAKSIM FEZULLA	195 VOTA

2- Në bazë të rezultateve Komisioni Institucional Zgjedhor shpall Fitues kandidatët:

- ARTUR PANDI BALLI
- KOSTANCA GAOO DOKU
- LORENC KRISTAQ BELLOVODA

Komisioni Institucional Zgjedhor

- ARDIAN MATKA (Kryetar)
- AIDA MOSKO (Anëtar)
- DORIAN MARKU (Anëtar)
- DEJVI HOXHA (Student)


 REPUBLIKA E SHQIPËRISË
 MINISTRIA E ARSIMIT, SPORTIT DHE RINISË
 MINISTRI

Nr. 5984 Prot. Tiranë, më 07.06.2019

URDHËR

Nr. 328, datë 07.06.2019


PËR
DISA NDRYSHIME NË URDHËRIN NR. 162, DATË 13.03.2019
"PËR LIRIMIN NGA Detyra të Anëtarëve të Bordit të Administrimit të Universitetit "Fan S. Noli", Korçë dhe Emërimit në Detyrë të Anëtarëve të Rrës, Përfaqësues të Ministrisë Përgjegjëse për Arsimin"

Në mbështetje të pikës 4 të nimit 102 të Kushtetutës së Republikës së Shqipërisë, në neneve 48, 49 dhe 50 të ligjit nr. 80/2015 "Për arsimin e lartë dhe kërkimin shkencor në institucionet e arsimit të lartë në Republikën e Shqipërisë" dhe Vendimit nr. 782, datë 26.12.2018 të Këshillit të Ministrave "Për përcaktimin e kritereve dhe të procedurave të përzgjedhjes së anëtarëve të Bordit të Administrimit, përfaqësues të ministrisë përgjegjëse për arsimin, në institucionet publike të arsimit të lartë".

URDHËROJ:

- Në pikën 2 të urdhrit, nr. 162, datë 13.03.2019, të shtohet shkronja "v", si më poshtë:
"v) Artur Balli!"
- Pika 3 e urdhrit, nr. 162, datë 13.03.2019, shfuqizohet.
- Nga kohen për zbatimin e këtij urdhri, Sekretari i Përgjithshëm i Ministrisë së Arsimit, Sportit dhe Rinisë, Universiteti "Fan S. Noli", Korçë dhe anëtarët e Bordit të Administrimit.

Ky urdhër hyj në fuqi menjëherë.


 Bgla SHAHINI
 Ministri

Urdhëri u Ministres për emërimin e z. Artur Balli si anëtar të Bordit të Administrimit në U. "Fan Noli"

Pjesëmarrja në votime për Anëtar Bordi në universitete ishte relativisht e ulët, ku vlen të theksojmë rastin në Fakultetin e Gjeologji Minierave morën pjesë në votime vetëm 55 studentë nga

2500 vetëm 2.2% e studentëve. Arsyet e mospjesëmarrjes lidhen me mungesën e besimit të procesit, mungesën e informimit paraprak dhe rëndësisë që kanë anëtarët e bordit në administrimin e parave të universitetit.

FGJM

9 MAJ 2019

NUMRI I PËRGJITHSHËM I VOTAVE TË VLESHME 55

REZULTATET E KANDIDATËVE PËR ANËTAR TË BORDIT TË ADMINISTRIMIT


Nr.	Emri	Adresa	Mbështet	Vota	Përqindja
1	BELO	EDMOND FAGU		0	0%
2	ESMERALD	ENVER FILAJ		4	7.2727%
3	LORETA	SIMON CAPELI		4	7.2727%
4	RIKARD	VIKTOR LLIKA		22	40%
5	ZINEL	GEZLEK SHALANI		25	45.45%

Vota totale	Vota të vlefshme	55
	Vota të pavlefshme	4
	Fletë të identituara	1
	Fletë të papërdorura	2440
	Fletë votimi në total	2500

Shënim: Kjo tabelë hartohet në 3 kopje. 1 kopje futet në listë të bashkuar me rezultatet e KZF dhe 1 kopje dorëzohet në KZ.

Anëtarët e KZF (fletat):

- Arben Bakici (Pro) Kryetar
- Altin Kallipi (Pro) anëtar
- Duljën Begiraj (Pro) anëtar
- Esmeralda Zepa (Pro) anëtar
- Kevin Kusaj (Student) anëtar


 KZF KRYETARI
 UNIVERSITETI "FAN S. NOLI" KORÇË

4.5 Pajisja me Kartë Studenti e të gjithë studentëve brenda vitit akademik 2018 – 2019



Situata Ligjore

*Sipas premtimit në “Paktin për Universitetin” **Karta e Studentit do të ishte pjesë e projektit të Kartës Europiane të Studentit** dhe do të lëshohej nga Qendra e Shërbimeve Arsimore. MASR do të bënte publike marrëveshjet e lidhura dhe listën e shërbimeve që përfitohen nga studentët me entet shtetërore, bashkitë dhe subjektet private duke përcaktuar shërbime me çmime të reduktuara për studentët në të gjithë vendin dhe për studentët e huaj në Shqipëri.

*Sipas ligjit 80/2015 për arsimin e lartë, Karta e Studentit është një dokument unik dhe institucioni përgjegjësi i vetëm për prodhimin dhe lëshimin e saj është Ministria e Arsimit, Sportit dhe Rinisë.

*Më 17 Prill 2019 u publikua në fletoren zyrtare vendimi i qeverisë nr. 226 për shërbimet që do të ofrojnë institucionet në kuadër të kartës së studentit. Ky vendim në pikën 11 të tij parashikon edhe një mundësi që përveç MASR, kartën e studentit mund ta prodhojnë dhe administrojnë me fondet e tyre edhe njësitë e vetqeverisjes vendore.

Me publikimin e këtij vendimi, bashkia Tiranë nisi menjëherë prodhimin dhe shpërndarjen e kartës së studentit në universitete.

Deri në datën 21 Tetor 2019 sipas burimeve të qeverisë u shpërndanë **20116 Karta Studenti** në kryeqytet. Karta e prodhuar nga bashkia Tiranë përmban 40 shërbime të miratuara nga Këshilli Bashkiak duke ofruar ulje për vizitat në muze, teatër e kinema por duke anashkaluar nevojat bazike të tyre si ushqimi, veshja, kancelaritë, librat, spitalet dhe komunikacioni.⁶ Bashkia Tiranë premtoi se me kartën e studentit do të përfitohej aboneja e përgjithshme me çmim 600 lek, dhe në fillim të muajit tetor studentët dëshmojnë se kanë përfituar abone student për transportin publik.

⁶ <http://top-channel.tv/2019/04/16/karta-e-studentit-40-sherbime-lehtesira-edhe-nga-kompani-private/>



Në kushtet e presionit nga ana e medias studentëve dhe ekipit të Qendresës për diskriminimin e studentëve në rrethet si përfitues të Kartës së Studentit, MASR në datën 11 shtator 2019 lidhi një memorandum bashkëpunimi me **Postën Shqiptare duke i deleguar kësaj të fundit prodhimin dhe shpërndarjen e Kartës së Studentit.**

Karta e Studentit referuar trendit të shpërndarjes do të jetë në duart e çdo studenti brenda vitit akademik 2019 –

2020, **ndërsa fuqizimi i saj me shërbime dhe produkte që i referohen nevojave bazike mbete një sfida më e madhe për ta kthyer atë në një instrument për lehtësimin e jetesës dhe kushteve studentore.** Buxhetimi i Kartës së Studentit ende nuk duket se është në planet e institucioneve përgjegjëse. Sipas Komunikimit zyrtar mes Qëndresës Qytetare dhe MASR, buxheti në dispozicion të Kartës së Studentit nga kjo ministri është 0 lek. MASR shprehet se kostot do të përballohen nga njësitë e qeverisjes vendore.

4.6 Rishikimi i titujve akademikë, teskteve mësimore dhe verifikimi i plagjiaturave në doktoratura

Më 26.12.2018 u miratua Vendimi nr.777 i Këshillit të Ministrave **“Për kontrollin anti-plagjaturë të disertacioneve për fitimin e gradave shkencore”**. Kjo VKM ndër të tjera parashikon krijimin e arkivit digjital të doktoraturave në Republikën e Shqipërisë pranë MASR dhe pasi të kryhet kontrolli i të gjitha gradave shkencore të akumuluar në këtë arkiv nëpërmjet një programi soft, ministria përgjegjëse për arsimin do të dorëzojë raportet e kontrollit digjital anti-plagjaturë pranë IAL-ve respektive për të vlerësuar dhe marrë masat respektive për titujt me probleme me plagjiaturën.

Referuar afateve të **“Paktit për Universitetin” duhet që brenda muajit Qershor 2019 të:**

- *Kryhet kontrolli Anti-plagjaturë dhe rishikimi i titujve akademikë.
- *Krijohet Arkiv Digjital i doktoraturave në Republikën e Shqipërisë pranë MASR.
- *Të miratohet ligji i ri për Kodin e Sjelljes dhe integritetin në kërkimin shkencor.

Nga viti 2007 deri në vitin 2018, në regjistrin e MASR gjenden vetëm këto të dhëna në lidhje me gradat shkencore dhe titujt akademikë:

- 248 Docent
- 3,757 Grada Shkencore “Doktor” brenda vendit
- 546 Grada Shkencore “Doktor” jashtë vendit
- 1,038 Tituj Akademikë “Profesor i Asociuar”
- 2 Tituj Akademikë “Profesor i Asociuar” jashtë vendit
- 503 Tituj Akademikë “Profesor”



Nisur nga premtimi i qeverisë në dokumentin e “Paktit për Universitetin” se **brenda muajit Qershor 2019 do të ketë nisur rishikimi i titujve akademikë, kontrolli anti-plagjiaturë dhe krijimi i Arkivit Digjital të Doktoraturave rezulton si një premtim i pa mbajtur në afat** sipas parashikimeve të vetë qeverisë. Nga komunikimi zyrtar mes Qëndresës Qytetare dhe MASR në muajin prill në funksion të Arkivit Digjital numri i disertacioneve të depozituara ishte 12, ndërsa në komunikimin në fund të muajit Qershor 2019 ministria është përgjigjur “informojmë se MASR është në proces për ngritjen e Arkivit digjital në bashkëpunim me AKSHI”.

4.7 Vlerësim i performancës në mësimdhënie, në publikimet online dhe regjistrimi i leksioneve.

Protesta e studentëve dhe monitorimet e Qëndresës Qytetare gjatë vitit 2018 ekspozuan nivelin e lartë të perceptimit të korrupsionit në universitetet publike dhe problematika të tjera të stafit akademik si performance jocosore, kualifikimet fiktive, rekrutimet pa meritë të stafit akademik, kurrikula jo bashkëkohore dhe vlerësime fiktive të performancës nga vetë universitetet.

Pakti për Universitetin e adresoi këtë problematikë duke parashikuar aplikimin e instrumentit të kontrollit dhe vlerësimit studentor të performancës së mësimdhënies dhe kërkimit shkencor të personelit akademik përmes Sondazhit Kombëtar të Studentëve (SKS). Raportet e vlerësimit të përgatitura nga ASCAL do t’i paraqiten Ministrisë së Arsimit, Sportit dhe Rinisë, krahas Institucionit të Arsimit të Lartë që i është nënshtruar procesit të vlerësimit, si dhe duhet të jenë pjesë e **dosjes personale** të çdo anëtari të personelit akademik.

1. Referuar Pakti për Universitetin, **brenda muajit Shkurt 2019** duhet të ishin ngritur grupet e punës me pjesëmarrjen edhe të studentëve në procesin e vlerësimit (SKS), **fakt që nuk u bë publik dhe nuk pati proces përzgjedhje për studentët që do të ishin pjesë e këtij grupi.**
2. Realizimi i Sondazhit Kombëtar të Studentëve dhe krijimi i dosjeve persoanle të pedagogëve – Qershor 2019
3. Hartimi i Kodit të Cilësisë në Arsim duke përfshirë shqetësimet e studentëve – Qershor 2019.

Për të adresuar problematikat e evidentuara gjatë protestës së studentëve dhe sipas parashikimeve në “Paktin për Universitetin” MASR realizoi Sondazhin Kombëtar të Studentëve në muajt prill – maj 2019. Pyetësi u hartua nga bordi i akreditimit i përbërë nga 11 profesorë dhe ju shpërnda rreth 100.000 studentëve në e-mail-et e tyre, ku pjesëmarrja e tyre ishte në masën 20%.

Përtej problematikave me vonesat dhe mospërfshirjen e studentëve në hartimin e pyetësit të sondazhit ky **proces anashkaloi dy zotimet kryesore që synonte të adresonte** ndaj studentëve që ishin trajtimi i fenomenit të **korruptionit në universitete dhe krijimi i dosjeve të pedagogëve** sipas vlerësimit në këtë sondazh. Pavarësisht se rezultatet e plota të Sondazhit nuk janë bërë ende publike, studentët në pyetësor nuk kanë pasur mundësi të shprehen në asnjë pyetje për raste individuale të korruptionit pasiv, të mungesës së etikës në mësimdhënie dhe të vlerësojnë pedagogët në mënyrë që në bazë të rezultateve të krijohen dosjet e tyre personale.

Ndërtimi i bibliotekave me standarte Europiane dhe me libër universitar online falas për studentët në gjuhën shqipe.

Për shkak të kostos së lartë të çmimeve të librave dhe mungesës së aksesit të studentëve në botime shkencore për realizimin e detyrave të kursit dhe kërkimit shkencor brenda IAL-ve, ndërtimi i një biblioteke online me standarte evropiane ishte një ndër kërkesat e studentëve.

Në muajin Prill 2019 u prezantua nga Kryeministri dhe ministrja e Arsimit, Sportit dhe Rinisë, Biblioteka Digjitale si një nga premtimet e “Paktit për Universitetin” që do të adresonte problematikën e kostove të blerjes së librave dhe do të rriste aksesin e studentëve në botime shkencore. Sipas

përfaqësuesve të qeverisë kjo bibliotekë krijon akses ndaj kërkuesve shkencorë në 50 mijë revista shkencore, 193 mijë libra akademikë dhe 30 module për të mësuar vetë në gjuhë të huaj. Cdo student apo pedagog mund ta aksesojë bibliotekën online përmes një llogarie unike dhe një fjalëkalimi.

Pavarësisht numri të lartë të materialeve shkencore që përmban biblioteka online, studentët nuk arrijnë të gjejnë informacion që përkon me kurrikulat e tyre mësimore dhe nuk aksesojnë asnjë libër, artikull apo material shkencor në gjuhën shqipe.

Ky premtim nuk përkon drejtpërsëdrejti me kërkesën e studentëve që synoi të adresonte, pra minimizimin e kostove të librave që blihen në librari ose mungesës së tyre në bibliotekat e universiteteve, pavarësisht se investimi total nga buxheti i shtetit për Bibliotekën Digjitale është **687.825 USD pa TVSH** për periudhën 2019 – 2022.

https://ulibrary.rash.al

ULIBRARY List Manual Contact Us

HAPAT PËR PËRDORIM

- 1. Përzgjidhni universitetin tuaj**
Kujdes! Ju nuk mund të përzgjidhni universitet të ndryshëm nga universiteti ku jeni regjistruar.
- 2. Përzgjidhni fushën e kërkimit**
Shkruani fushën që ju intereson të kërkoni dhe klikoni "Search".
- 3. Identifikohuni**
Në formën që do ju shfaqet, vendosni email-in tuaj.

RASH Albanian Academic Research Engine (ALARE)

--Please select your institution-- Keyword Enter search term Search

4.9 Premtimet Plus

4.9.1 Portali www.punetembare.al

Në kuadër të paktit për Universitetin u premtuan 1000 vende punë në administratën publike për studentët nëpërmjet një procedure “sui generis” duke plotësuar të gjitha pozicionet vakante të kategorisë ekzekutive me studentë ekselentë. Kjo mundësi u krijua nëpërmjet VKM nr. 766, datë 26.12.2018 e cila parashikon që për vitin 2019, pozicionet vakante të kategorisë ekzekutive (specialist dhe të barasvlefshme), në institucionet e administratës shtetërore, pjesë të shërbimit civil, të plotësohen me prioritet nga studentët e ekselencës të diplomuar duke filluar nga viti 2017 e në vijim, nëpërmjet punësimit të tyre me kontratë të përkohshme 1-vjeçare (njëvjeçare).

Sipas monitorimit të Qëndresës Qytetare ky është një ndër premtimet e mbajtura të qeverisë në kuadër të Paktit për Universitetin por gjithashtu duhet theksuar se premtimet plus nuk erdhën si pasojë e kërkesave të studentëve por si reflektim i vetë ekzekutivit. VKM 766 parashikon se kjo politikë qeveritare është e vlefshme vetëm për vitin 2019 dhe për studentët e punësuar dhe nuk siguron qëndrueshmëri në shërbimin civil por vetëm eksperiencë pune.

4.9.2 Kampusi Universitar Tiranë

Nëpërmjet Urdhrit të Kryeministrit nr. 184, 26/12/2018 u ngrit grupi i punës përpërgatitjen e ngritjes dhe funksionimit të Kampusit Universitar të Tiranës. Ky grup do t’i paraqesë MASR dhe Kryeministrit raportin përfundimtar të studimit dhe plan-veprimin e ndërtimit të kampusit brenda datës 31 Mars 2019. Ndërkohë që projekti i Kampusit Universitar u bë pjesë e platformës elektorale të kandidatit për kryetar bashkie të Partisë Socialiste në Tiranë duke prezantuar projektin për ndërtimin e 11 godinave të reja në Qytetin Studenti dhe ambienteve për lexim e studim. Pritet në vijim prezantimi i projektit dhe ndërhyrjeve konkrete në zonën e parashikuar.

Qeveria kishte parashikuar që brenda muajit maj 2019 të krijojë **Fondin e Solidaritetit** për arsimin e lartë, ku 20 % e fondit të përgjegjësisë sociale të korporatave që gëzojnë kontrata koncesionare të shkojnë për financimin e Arsimit të Lartë. Deri në muajin Nëntor 2019 ende nuk ka asnjë shifër publike ose dokument publik që provon faktin e kalimit të kësaj shume në një investim për arsimin dhe studentët.

4. Konkluzione

Protesta e studentëve rezultoi efikase për të **tërhequr vëmendjen e qeverisë** dhe për të ndërtuar një diskurs **të debatit publik mbi çështjet e arsimit të lartë** pas një periudhe të gjatë mungese vëmendje nga të gjitha qeveritë dhe vendimmarrësit publikë. Në aspektin e organizimit kjo protest ishte “sui generis” pa grup përfaqësues dhe pa struktura hierarkike.

Me rënien e presionit dhe interesit studentor, ritmi i realizimit të Paktit për Universitetin ra, prezenca mediatike zvendësoi transparencën dhe u shkelën afatet e paracaktuara. Mungesa e presionit të vazhdueshëm dhe mungesa e urave të komunikimit sjell zbatim të deformuar të premtimeve dhe si përfundim mosarritje të plotë të qëllimit kryesor të protestës.

Universitetet dhe drejtuesit e tyre gjatë dhe pas protestës nuk dëshmuar autonominë dhe pavarësinë që ligji synon t’ju japë, ato nuk arritën dot të kuptojnë, mbështesin dhe ndihmojnë studentët.

Ligji 80/2015 për Arsimin e Lartë i cili reformoi arsimin e lartë vazhdon të mbetet i pa zbatuar në mungesë të akteve nenligjore, dhe pavarësisht problemeve të shumta **nuk ka asnjë analizë shtetërore për vlerësimin e efektivitetit të tij në sistemin arsimor.**

6. Shtojca

Nr. 6361/1 Prot.

Tiranë, më 08.07.2019

Lënda: Kthim përgjigje kërkesës për informacion.

ORGANIZATËS QËNDRESA QYTETARE
Rruga 'Hoxha Tahsim', Pall. 'Vjero' Ap. 23A, Tiranë

Në përgjigje të shkresës suaj datë 17.06.2019, regjistruar në Ministrinë e Arsimit, Sportit dhe Rinisë (MASR) me nr. 6361 prot., datë 19.06.2019, ju informojmë mbi çështjet e paraqitura në kërkesën tuaj:

1. Listë me anëtarët e bordit të zgjedhur nga studentët përfaqësues të MASR-së në 14 universitetet publike ose të gjitha ato që disponon:

Bashkëlidhur lista e anëtarëve të Bordeve të Administrimit të zgjedhur nga studentët përfaqësues të MASR-së.

2. Kostoja/buxheti total i Bibliotekës Online:

Për sa kërkohet në pikën 2, buxheti total i Bibliotekës Elektronike është 687.825 USD (dollarë amerikanë) pa TVSH, për periudhën 2019-2022.

3. Buxheti total në dispozicion të Kartës së Studentit nga MASR për vitin 2019:

Sa i përket buxhetit total në dispozicion të kartës së studentit, sqarojmë se në buxhetin 2019 të MASR-së nuk ka fonde të parashikuara, pasi koston përballohen nga buxheti i Njësitve të Qeverisjes Vendore të cilat janë ofruar për implementimin e saj, sipas përcaktimeve të VKM-së numër 226 datë 17.04.2019.

4. Numri i disertacioneve të mbledhura për arkivin digjital të disertacioneve si dhe numrin e titujve të identifikuar me plagjaturë:

Përsa i përket arkivit digjital të disertacioneve, informojmë se MASR është në proces për ngritjen e tij në bashkëpunim me Agjencinë Kombëtare të Shoqërisë së Informacionit.

SEKRETAR I PËRGJITHSHËM

Oltjon MUZAKA

Adresa: "Rruga e Durrësit", Nr. 23, AL 1001, Tiranë. E-mail: info@arsimi.gov.al www.arsimi.gov.al

Nr.	IAL	Anëtarët e bordit të administrimit zgjedhur nga studentët
1	Universiteti "Luigj Gurakuqi" Shkodër	Ted Paco
2	Universiteti Bujqësor i Tiranës	Marin Mema
3	Universiteti "Eqerem Çabej" Gjirokastrë	Erjon Nebiaj
4	Universiteti "Ismail Qemali" Vlorë	Anjeza Shiko
5	Universiteti "Aleksander Moisiu" Durrës	Eteleva Leskaj
6	Universiteti "Aleksander Xhuvani" Elbasan	Luan Rapi
7	Universiteti "Fan Noli" Korçë	Artur Balli
8	Universiteti i Arteve	Bujar Kapexhiu

Nr. 2708/2 Prot.

Tiranë, më 04.04.2019

Lënda: Kthim përgjigje

ORGANIZATËS QËNDRESA QYTETARE
Tiranë

Në përgjigje të shkresës suaj drejtuar Ministrisë së Arsimit, Sportit dhe Rinisë, regjistruar me nr. 2708 prot., datë 06.03.2019, ju bëjmë me dije se:

Në lidhje me kartën e studentit, në vijim të ngritjes së grupit të punës pranë Ministrisë së Arsimit, Sportit dhe Rinisë, është duke u proceduar me hartimin dhe miratimin e akteve nënligjore përkatëse.

Në zbatim të urdhrimit nr. 41, datë 24.01.2019 të Ministrisë së Arsimit, Sportit dhe Rinisë "Për njoftimin e fillimit të procedurave të përzgjedhjes së anëtarëve të Bordit të Administrimit, mënyrën e vlerësimit të kandidatëve dhe afatin e dorëzimit të dokumentacionit", është bërë publike procedura, dokumentacioni dhe afati për aplikim për anëtar bordi si përfaqësues të MASR. Në vijim të vendeve vakante, është rihapur procedura për aplikim në zbatim të urdhrimit nr. 171, datë 15.03.2019 "Për rishpalljen e procedurave të përzgjedhjes së anëtarëve të Bordit të Administrimit, mënyrën e vlerësimit të kandidatëve dhe afatin e dorëzimit të dokumentacionit". Lista me anëtarët e përzgjedhur është e aksesueshme në faqen zyrtare të Ministrisë së Arsimit, Sportit dhe Rinisë www.arsimi.gov.al.

Në funksion të Arkivit Digjital, numri i disertacioneve të depozituara është 12.

Numri i studentëve që ndjekin ciklin e parë të studimeve dhe përfitojnë reduktim të tarifës është 67225. Numri i studentëve që ndjekin ciklin e parë të studimeve dhe përfitojnë bursë është 9258. Numri i studentëve që ndjekin ciklin e dytë të studimeve dhe përfitojnë reduktim tarife është 3349. Efekti financiar në lidhje me reduktimin e tarifave dhe përfitimin e bursave është 2.1 miliardë lekë.

Lutemi gjëni bashkëlidhur një kopje të memorandimit të mirëkuptimit midis CNOUS dhe QSHA për realizimin dhe zbatimin e Kartës Evropiane të Studentit në Shqipëri, si

Adresa: "Rruga e Durrësit", Nr. 23, AL 1001, Tiranë. E-mail: info@arsimi.gov.al www.arsimi.gov.al

dhe një kopje të urdhrimit nr. 104, datë 21.02.2019 të Ministrisë së Arsimit, Sportit dhe Rinisë "Për disa ndryshime dhe shtesa në urdhrin nr. 353, datë 27.06.2018 "Për ngritjen e grupit të punës për monitorimin dhe administrimin e ankesave, sugjerimeve dhe nisave të portalit "shqipëriaqduam.al", të ndryshuar.

Duke ju falënderuar për bashkëpunimin,


SEKRETAR I PËRGJITHSHËM

Oltjon MUZAKA

QËND

Adresa: "Rruga e Durrësit", Nr. 23, AL 1001, Tiranë. E-mail: info@arsimi.gov.al www.arsimi.gov.al

etin



**QENDRESA
QYTETARE**